



常熟縣水利全書附錄卷上

管工官

王簿王

化

張以正
曾承忻

典史

羅欽俸
俞鈺

巡檢

孫應登
施甘棠

吳道真

承行吏

袁繼賢
楊采葑

同抄錄

原奉撫院明文興脩水利府帖

蘇州府帶管水利同知韓 為督撫地方事准府關奉

兵備按察使鄒 憲牌該奉

巡撫都御史曹 憲牌內開吳中財賦全資水利故築圩岸

以禦靈澇濬河渠以便蓄洩皆水利急務居民上者所宜加

之意也頻年以來每歲督脩罔敢暇逸是以雖當多事之秋

而田疇頗易米價頗平地方安堵如故者則以水利能興旱

澇有備故也倘因目前幸稔遂謂時值其豐而以水利爲可
忽卒遇旱澇其何能濟病國病民所係非眇小矣茲者農工
已畢脩濬正當其時相應及時興舉仰道卽行所屬各州縣
掌印官輕輿寡從親詣各鄉督同塘圩業戶人等將各處圩
岸河塘等項逐一查勘但有傾圮者責令脩築高厚淤淺者
責令開濬深濶若工費不多民力能支者責令業戶出米佃
戶出力趁時築濬如果工程浩大應用官助者有何堪動官
銀勘估詳奪此係國計民瘼所關甚重必須各屬掌印官親
自綜理稽核務要着實加工毫無虛冒庶旱澇有資耕穫有
賴工完之日仍聽府水利官遍詣各鄉覆核的確造冊送道
驗實報院以憑 奏繳若止聽該州縣水利官仍前虛應故
事苟且塞責及因而科索擾民者或本院訪出或被人告發
定行叅治不貸先具下鄉查勘日期緣由繳查等因備牌仰
府卽關水利廳轉行各屬掌印官一體遵行等因備奉關行
到廳准此帖仰本縣官吏照依帖文備奉憲牌事理卽便親
詣各鄉沿坵履畝督同塘圩業戶人等查勘各圩岸有傾圮
者責令脩築高厚各河渠有淤塞者責令開濬深濶事簡者
着用民力工浩者詳動官銀趁今農隙各掌印官須躬親查
勘得實疾速興脩與濬工完造冊申府仍聽本廳親臨下鄉
覆勘的確以憑轉報施行此係有關國計民瘼緊事毋得遲
違須至帖者

按院明文興脩水利府帖

蘇州府爲開濬水利以通糧運以資農業事蒙

署蘇松兵糧道本府知府李憲牌蒙

巡按御史馬憲牌內開三吳澤國田土高下不同稼穡所

資惟水利爲重使高有灌溉低有宣洩雖遇旱澇當必無患况蘇州抵京口一帶河道乃糧艘必由之路實轉漕咽喉邇年乾旱恐河淺阻運又非細故通應亟濬以期運無所阻農有所資行道轉行各該府州縣掌印水利等官乘今農隙將各處支河田圩岸塍躬親踏勘高鄉淺塞處所不通車戽者亟宜開挑引灌低鄉岸壞不能遏流者可以增築抵禦俱從實丈明估計夫工工程小者督令塘里着業主佃戶自行脩築工程大者詳動官銀量行給發上緊興工濬築其在運河

查有淤塞去處作速開挑與在城河路併宜開通挑起淤塞泥土責令管工負役運堆遠地不許就便堆積兩岸致仍雨淋坍塞庶使轉漕運道通行農家旱澇有備一勞永逸督濬工完報竣勘果深通圩岸堅固查無虛冒用過錢糧造冊送兩院開銷此係每年奏報干係國計民生事理毋視虛文怠玩先令各具遵行緣由並興工日期呈報等因備牌仰府卽便關行水利廳轉行各屬掌印水利等官趁今農隙將各境內應濬河渠應築圩岸并城河運河凡有淤淺去處俱要開濬深通挑築堅固仍酌量工程大小應動用民力者徑用民力應動官銀者請詳支用濬築完工報府核明造冊送道以憑轉報先令具遵行緣由并興工日期徑報院道查考等

因蒙此行間先奉

兵備按察使鄒憲牌爲督撫地方事該奉

巡撫都御史曹憲牌仰府卽行水利廳轉行各屬掌印官卽便親詣各鄉督同塘圩業戶人等查勘云云等因通行各屬勘報去後今蒙前因合再通行爲此帖仰該縣官吏查照帖文備奉憲牌先今事理文到督同水利官趁今農隙躬詣各鄉查將各境內凡有高鄉支河田圩淺塞處所不通車戽者亟宜開挑引灌低鄉岸塍傾圯不能遏流者卽便增築高厚逐一查勘工程大小應用民力者徑用民力應用官銀者詳動官銀火速興工具由申報完日備造工程錢糧文冊申府轉達施行此係濬築河圩事干國計民瘼錢糧緊事毋得故違須至帖者

撫院通行無錫縣條陳水利府帖

蘇州府爲督撫地方事奉

兵備右叅政楊憲牌奉

巡撫都御史周憲牌內開據無錫縣條議內一欵築隄岸

以備旱澇本縣固東南一水國也其間平原沃野僅十之四而高阜下濕可十之六昔周文襄公築岸成田如天受青城萬安興道招義諸區計築圩岸三百餘條芙蓉一湖膏腴萬頃民永賴之第歲久則圯廢潰莫脩遇旱則水無所蓄四顧黃埃遇澇則水無所障一望流澌如楊家大圩南北都圩東西葑岸鴻塘李涇白湯等圩懼此患也竊謂有岸不脩與無

岸同傳曰雖護石田無所用之斯之謂矣第議脩之而官帑無金民力告竭當事者徒扼腕一歎何益合無俟冬成之時逐處踏勘沿河兩岸并各處舊隄查其田畝之多寡計其工程之大小責令食利佃作人戶計畝脩築倘有好義富戶願多脩不計畝數者申獎其工力浩大者民出其半官查堪動錢糧以其半佐之夫一家方丈百家千尋易集也傻一羶悅其名誘勸其事易動也傻二捐公帑之儲興民間之利易舉也傻三將廢壞盡與旱澇無虞一勞永逸一費永寧之術盡在於斯等因到院據此看得吳中水利乃財賦之所自出而築圩岸與濬河渠其最要者顧興脩必須農隙而查勘貴在先時今該縣條議及此深爲足國裕民之策擬合通行仰道卽便通行所屬各府水利官各將所轄境內河圩逐一查勘要見某處某河淤塞應開某處某岸傾圯應築某河某岸工程小應用民力築濬某河某岸工程大應動官銀幫助務要先時查勘的確預行造冊畫圖貼說詳報以憑批發至秋成農隙聽本院親勘明白隨即舉行再照官以水利名水利乃其專職邇來多曠廢本等職業及救精神於別務殊失 朝廷設官之意本院惟以水利之通塞課各官之殿最今後各宜單騎間從沿坵履畝親自踏勘不許多帶從人以滋騷擾等因奉此擬合就行爲此仰府照依備奉憲牌內事理卽便關行水利廳轉行各屬掌印水利官將境內河圩逐一踏勘要見某處某河淤塞應開某處某岸傾圯應築某河岸工小

應用民力某河岸工大應用官銀先期踏勘的確預造手冊
畫圖貼說通詳批發至秋成後聽候院道親勘舉行其水利
官職專課農務以水利之通塞查各官之勤惰定賢否之優
劣今後各宜卑騎寡從沿坵履畝踏勘毋帶多人滋擾地方
未便等因奉此案照先奉 本道爲開濬水利以通糧運以
資農業事該奉 撫 按憲牌前事俱經通行本府水利廳
及各屬查勘應脩應濬河圩合用官銀民力冊報去後節催
未據完報今奉前因擬合通行爲此帖仰本縣官吏查照帖
文備奉先今憲牌內事理卽將境內河圩督同水利官輕輿
寡從沿坵履畝逐一踏勘要見某處河道淤塞應開某處圩
岸傾圯應築或工小應用民力工大應動錢糧先期勘確造
冊畫圖貼說明白具由申府以憑覆核通詳俟至秋成舉行
如或今春先有奉文脩濬完工處所不論官銀民力速行造
冊開報聽驗轉達此係有關國計民瘼緊事實水利官之專
職賢否在此展別毋得因循虛應徒滋騷擾未便須至帖者
里排乞濬福山塘呈

二十四等都里排王忠魏讚曹和張鏡褚應元等具呈爲疏
濬極要水道以利民生以裨國計事竊惟縣有福山大塘北
接海潮南通湖水其東西則有九澗屈塘方浜等枝河二十
餘條悉賴此塘之水以灌溉田畝救濟萬姓譬猶人身之喉
舌喉舌塞則食不下咽矣大塘淤則枝河不通矣憶昔嘉靖
年間動興大工勤于開濬不至淤淺近自萬曆十七年開後

兩旁蘆艸交加似無河影水底泥沙壅塞涸如丘垤卽如今歲自夏至秋旱乾太甚民皆待命于斯而竟無勺水之停矣天臺爲國家計爲民生利必欲開濬此塘如全責民力是欲以養民而反以累民也如盡取足于官帑恐官銀有限而工費無窮也其必查照先年開白茆七浦等塘大工事例請詳撫按道府動用通縣有力大戶爲之首倡官給其工費之五六民用其力者三四庶事可濟而功可成上不煩而下不擾然此塘一開而枝河不濬則勢如山上山下水從低流其害尤甚故開大塘則當隨濬枝河濬枝河一法在于得業人戶照田派塘其爲力易易也忠等生逢仁治此正在利所當興者有此瀝血具呈

公正乞濬福山塘呈

四十五都公正吳光復王用蔣俸益錢德懋等呈爲懇天請給協濟大工以裨國計以惠民生事切有本縣福山大塘東聯耿涇以通白茆鹽鐵西接九澗以通奚浦浪澄南由縣治輸載必經之路北抵大江商賈必由之所旱澇賴之以蓄洩舟楫賴之以通行况附本塘枝河不下及百餘條四通八達乃邑中之第一緊要幹河也兩旁田地不啻數百萬頃國課民生實所攸關邇年來苦被潮沙淤塞四方商艘不通半邑糧儲難運水線處僅容一小舟乾涸處則人行河底四面枝河悉成平陸以此每歲遇旱傍塘田畝尚可車救腹內禾苗無不枯槁小民徒受徵糧賠賦之苦上人徒煩催科比併之

勞往來有負戴之艱商賈有盤駁之患今幸仁臺下車視民如子得議開濬萬姓更生然此塘于嘉靖年間動用官帑開挑勤于疏濬是以難淤後至萬曆十七年間方始淤塞復蒙前任王請發河工銀兩疏濬得通迄今年久未復一濬以故湮塞太甚較之嘉靖萬曆間工程一倍今爲三四倍矣切思萬姓值此水旱頻仍之後民力告匱之時况各枝河並舉當此大工民不堪任然各枝河例用民力開通其大塘非領官帑曷克有終幸蒙天臺親臨閱勘洞悉商病民瘼伏乞申請堪動官銀將本塘刻期開濬其各枝河責令兩旁得利業戶照田自備夫工一併疏通庶使國計有裨民生有賴陰功萬代有此連名上呈

里排乞濬奚浦呈

十四等都里排錢文成黃澹閣錢洽錢道等具呈爲懇天請給錢糧以濟河工事竊照奚浦塘北自海口南至界涇約計四千餘丈隆慶六年萬曆十年兩次開濬動支官銀三千餘兩邇年潮沙漲塞傍塘田畝尚可車救腹內禾苗屢遭旱槁糧米上倉舟楫難通及有界涇南至浪澄又計二千餘丈悉皆淺涸此係六七八二十二等都田地相關運糧要道今蒙天臺酌議水利事宜實爲國爲民第工程浩繁田土磽瘠且萬姓水旱頻仍之後民財匱乏之時若非全給官帑人力實不能堪伏乞申請應動官銀以濟河工以救民生有此具呈

公正乞濬奚浦呈

公正黃閣黃鉞錢抑錢就等具呈爲求天親臨查閱緊要運河以利民生以裨國計事竊照閣等七八九上中下十四都田畝不下百餘萬頃國儲數萬餘石皆賴奚浦塘通潮接水以資行涉自萬曆元年至十一年兩經疏濬至今苦因年遠悉被潮沙壅塞以致旱不能救澇不能洩國計無裨民生無賴閣等呈蒙前任譚 掌印王 准行查議第值農忙轉任起程未賜舉行中止卽今天臺駕往福山閱視水利閣區與福山遠不數里瞬息可到懇乞一視同仁親履一勘國計幸甚民生幸甚有此上呈

里排乞濬三丈浦呈

十四都八九十一等都里排錢端錢道錢就徵黃冕錢姜瞿蕭信錢道龐江等呈爲通水利順輿情萬命攸關百里樂業事本邑三丈浦乃西北之要津首連楊子大江尾通三縣水口東流奚浦西洋西接新庄潢浦百里旱澇所係億萬農命所關濬則枝河流布而汙邪爲上田淤則各港絕流而上田爲甌脫論征繇供半邑之賦稅言利病實萬姓之嚙喉若舉大工豈曰小補萬曆七年陞任留 未濬之前延亘百餘里蒿茆滿目煙火蕭條居民逋逃有田無主積墮錢糧動以千計自旣濬之後流民還鄉板荒開墾連遭旱澇而盜賊消息雞犬之聲相聞安居稠密戶無積欠至今尸祝若覩河洛而思禹功也乃今江口隘塞河流如線旱不得停蓄以需灌溉澇不能通暢以縱發洩田土將蕪羣黎將散有糧何所運其

舟楫有土何所施其桔槔此必然欲開之勢而爲今日之急務也如畚鍤將興懇臺親履其地相度機宜設立千百長計料河工動支官帑務使勞民力而不煩民財一倡千諾懽然于來庶大工可竣而民無怨謔矣有等姦民阻撓敗事不曰民窮財盡則曰水利無沾以此淆惑聽必兩可臺下旣處置錢糧而又親臨的審實沾水利當事者一分皁白自塞羣邪之舌矣有此連名上呈

博訪水利事宜示

常熟縣爲集衆思禪不逮以興永久水利事本縣生長北方不習水利不諳濬築方畧本不敢妄議經理但待罪此土已逾八月矣目擊耳聞此間似惟水利爲大務則脩濬河渠補築圩岸之工不得不講而行之况福山奚浦三文浦等塘見今議開卽槩縣塘圩將次第興舉若緩急利弊及算田派夫分工督工官帑民力一切未盡事宜可以教我者許用艸紙開欸不時呈遞以憑採決施行夫愚民可與樂成難與慮始智者見于永久不計目前今本縣虛衷以待凡鄉紳父老百姓人等卽衙門賤役凡有一見一畫者勿以愚昧而舍我可也特諭

與通邑縉紳書

海虞澤國水利爲重不肖叨令于茲犬馬之勞其何敢辭若擇小而易爲者聊加濬築以博美名又恥爲之故通行查勘次第脩舉先急而難次緩而易數年之後徼倖有成亦私心

一快矣聞太倉王相公爲縉紳首倡不論官民一體用力嘉定則專用民力不及縉紳夫太倉之縉紳肯先勞于民而嘉定之百姓肯先勞于已信皆賢而可敬可愛者昨喚福山塘奚浦三丈浦等處公正人等諭之俾爲嘉定之百姓皆未肯帖服及行水利衙覆議亦云開河之役不論水利遠近毋拘官戶小民不問花分詭寄不論田數竒零一槩通融計算照畝派工此法最善其議亦公自縉紳至于黎庶無不稱便而樂從之者如錢蔣蕭三宦皆有倡和之意畧無覆議之言况宦家之產其數頗多開濬河道其利害得失與百姓同關休戚較與別項雜差事體不侔若竟優免于縉紳而獨用乎民力則人愈少而工愈遲輿論不愜刁怨沸騰矣據此尤恐未妥蓋公正人等美其巧舌于該衙未可知也謹錄太倉嘉定之事并水利衙覆議之詞請教台臺夫吾民相安于服役則不肖亦烏用此喋喋而王相公之高誼諒亦台臺之所不多讓也敢請諸執事以爲鼓舞興作之助何如何如

沈大參回書

諱應科號全吾

敕縣名常熟所資於水利甚弘廢而不講使民待命於天失其名矣伏仰老父母榮蒞以來事事爲國念念爲民不佞輩樂有瞻依樂有怙恃無日不庇於二天也矧因民之利而利之莫大於開濬敢以官民生異議乎卽小民願爲嘉定而生輩亦願爲太倉惟老父母所使耳謹復

蔣侍御回書

諱以化號養庵

臺下爲吾虞倡不朽業凡編戶分從畚鍤之役何必遠法婁
江相公卽臺下一片契腸奚忍異同矣薄業受此渠利者甚
少亦何敢以少自諉計畝均派惟臺下是命

蕭觀察回書

諱應宮號觀復

敕邑水利之興最爲急務前段譚二父母俱啟其端而未竟
其工民甚恤之今蒙老父母垂念及此誠一邑之幸也論田
均派自是公論不肖輩縱不能及太倉之縉紳寧敢後於嘉
定之小民耶

錢侍御回書

諱岱山號秀峯

蒙以開河事下詢此台臺一腔實心地方百年永利敢不披
心腹酌事宜以對惟高明裁察焉查嘉靖初年嘗開白茆塘
矣開三丈浦矣時未及官戶也至萬曆八年又開三丈浦矣
時官戶量派如舍下暨蕭觀復黃澹吾春池先叔各家每廿
十五丈而止未全派也若今日之事則有不可例論者開河
盛舉也臺下惓惓不憚勞不徼一時之小利而圖百年之大
功盛心也此事主持在臺下協助在民力而從中倡率相與
贊成之者在縉紳同關休戚與別項雜差不同而其產頗多
其力稍裕委如臺下所云者若縉紳不開則齊民之心不服
官家旣派則衆戶之口何辭水利衙雖未嘗與治生輩言之
而治生輩亦未有相許者今聆臺下一言則翕然子來莫敢
後矣照田均派此今日之公議而臺下當執之以果斷之以
必勿復狐疑者第均派一節蓋亦有說治生於福山港相離

稍遠不甚諳習惟三丈浦則祖居存焉卽一浦而餘港可推卽治生一戶而餘戶可推三丈浦坐落六七八九十一及上十四中十四下十四等八區則開三丈浦者惟照此八區之田而餘區不相涉也如治生九都人也治生一戶有九都田有六七八十四等都田則皆應派者若別收各區之田則與該浦何與而亦混派乎辟如低鄉自有築岸之事與高鄉無干治生田在低鄉而亦派及則低鄉之民可俱派乎若低鄉之民有田在此八區者則亦當計畝照派如治生雖遠離福山港而有田在彼都則仍派開福山港無辭也治生一戶以十分爲率田坐八區內者十之六七在各區收入者十之三

四此責令各總書查報銷圩細數不能隱蔽若戶內有弟男子姪併入者只照都分儘派治生名下治生另通融計算分派弟男子姪總之了治生一戶事而後止此不獨官戶爲然其民戶亦照此分派則上下輕重至公至平土俗人情允宜允合而臺下美意遵行無礙矣或又以田之肥瘠地之遠近爲言者此似不然蓋人誰有不稱已田之瘠而稱人之肥者官司何從據考至於遠近之說意謂傍河爲近離河爲遠不知田雖離河而枝河之灌溉未有不從大河入者則安得以遠論也如以肥瘠遠近爲詞而立量派多派之別則彼此互爭祇以開公正人等作獎之寶而混亂官府之耳目不若照都據田有冊可証上之立法旣稱畫一而下之赴役亦無偏枯愚見如斯惟臺下詳察而精計之

又

開河議不論官戶民戶只照都分田畝似爲簡要若以肥瘠遠近而立爲量派加派之說則民間互爭祇以開獎竇而滋煩擾惟台意以爲何如

陸郡丞回書

諱枝號培吾

承諭濬築兩事蓋在高鄉則疏濬塘河在低鄉則脩築圩岸不肖田坐潭塘極低水區歲以水澇爲憂歲以脩築爲望老父母此舉誠爲地方興永利小民幸甚不肖幸甚若爲通邑計不如高區專任開河以防旱災低區專任築岸以防水患更覺稱便惟老父母廣詢輿論酌而行之設托名縉紳以圖優免徃役之謂何則子民之義所不敢也肅此布復

陳郡守回書

諱國華號珮允

伏承台臺爲救邑興水利甚大經濟也第舉大事動大衆必須輿論僉同人心樂從庶不築舍道旁耳據台諭官戶小民通融計算照畝派工則以槩縣之人工開槩縣之水利無所不可惟台臺主持而告戒之我輩奉行而已不佞爲子民者又安所置喙耶敬復明命不宣

錢刺史回書

諱達道號培垣

承翰教水利一事真天地父母之心無非爲救邑造不朽計第道等忝列衣冠誰非朝廷赤子而好義急公一念詎敢自後於百姓哉則有太倉之芳躅可追而嘉定無論已公正人等懼興大役而每借縉紳之口陰爲阻撓更望台臺極力

主持勿生疑沮幸甚至如枝河尤宜並濬蓋大河以通舟楫而枝河切近坵圩故不濬大河則已若濬大河而不及枝河則枝河反高而水勢難以逆上凡田之屬枝河者皆成荒棄矣况大河之工百倍而枝河之工不過百之一二耳其工甚易而其利甚溥以是知濬大河尤不可不濬枝河也敢因明問而并及之

陸郡守回書

諱化淳號湛源

伏讀翰教知臺下深軫民艱實心興舉凡在編氓疇不仰德况生輩叨列衿紳肯居細氓之後乎不肖淳占籍水區戶田無幾倘有與福山奚浦等處相關者自當一體均勞不敢愛也跽伏村郊未皇躬叩肅此代復不宣

翁掌科回書

諱憲祥號完虛諸回書數日後方全惟此書即時到

承台諭濬河事知老父母爲萬姓勞神委曲懇到心感心服其論田派工一節自然宦家與民家一體若有所區別其間勿論在官勞擾在民怨咨且縉紳爲士民領袖倘使已蒙其利而小戶獨任其勞此心何能安也太倉之議正大公平無復他說惟老父母主裁耳

瞿進士回書

諱汝說號達觀

承諭乃邑中公利賢父母肯爲通邑焦勞子民安有不樂從者敬如台命

張孝廉回書

諱萬齡號龍淵

台諭諄懇足仞爲民感心不肖敢不趨承以奉奔走

張孝廉回書

諱大受號鴻所

莊誦台諭欽仰盛心體國利民惠至溥也照畝派工此法最善生等方踴躍懼忤願沐仁政情效子來肯居太倉之後乎惟台下渙斷舉行造福無疆敝邑幸甚生等幸甚

翁孝廉回書

諱應祥號昇宇

伏讀台諭知老父母委曲勞神爲地方垂永賴德意至深遠也凡在子民罔不樂趨奚論官戶民戶哉仰候老父母主持祥等當從諸縉紳後敬共台命而已

顧孝廉回書

諱雲鴻號朗仲

承諭備悉仁臺盡力至意敢不唯命敬復

陳孝廉回書

諱星樞號拱薇

承台諭具悉臺下盛心作虞民萬年之福不佞輩敢不鼓舞從事

視河牌

常熟縣爲公務事照得本縣的于 日 時起馬前往福山塘閱勘本塘及一帶河道合先遣牌知會外今照本縣食用蔬菜俱自備帶並不用民間一茶一米如有跟隨人役指稱買辦爲由騷擾地方許諸色人等不時口稟以憑拿究如有隱匿不稟查出一體重治

發福山塘河工錢糧示

常熟縣爲親發河工錢糧事照得本縣的于 日 時自縣治起馬前往福山塘閱視河工就優散給錢糧已先遣牌

知會外第查得散銀之法往往有侵剋短少需索等弊合再行牌爲此仰着本塘八扇管工千百長卽便齊集各名下應管領夫業戶在于各該號段俟候本縣挨順唱名給發每夫先給一錢餘俟詳允之日另發不許紊亂躋擁其銀包封發與千百長千百長隨宕分發與領戶領戶散與幫戶若封內短少分釐許千百長口稟坐罪庫吏定不姑息若領戶不公責在百長百長不公責在千長但有短少卽係侵剋及衙門人役指以假頭需索等項情弊許諸人口稟以憑重治如有容隱不舉查出千百長一體究罪不恕

覆福山塘夫工錢糧申畧

查看得福山奚浦三丈浦三河目今淤塞之勢大畧相似然工難並舉而所最急者莫甚于福山一塘蓋此塘延袤三十六里爲八區一千六百九十七頃田地之襟喉又爲江北一帶淮揚等處商船貨物往來之要路故福山有猪稅之常供戶部有稽稅之專役往時本河通暢商民並利今淤塞已久凡貨到也則商人有雇夫盤駁之累遇佈種也則農夫有桔槔無措之難及至小民出入則有負戴跋踈之苦商民稱困未有甚于此時者也繇是奉詳之後本縣卽日喚集公正蔣俸益錢德懋王用等及各該區千長王忠吳光復魏讚等從公丈見本河共長四千四百八十丈內除水深面濶二百二十七丈不必濬外實應濬河四千二百五十三丈今濬河身深通廣濶俱以仰月爲形面濶五丈腹濶四丈三尺底濶三

丈兩岸虛深不算連水面開深五尺以此爲則通長共算見
土方八千七百一十八方六分五釐于內又除深濶處所不
必濬挖水積見不等土方一千二百七十方一分五釐外實
應濬土方七千四百四十八方五分卑縣親臨宕所先將土
方挑試每方該工一十六工以前土方統計該工一十一萬
九千一百七十六工應于兩旁得水利田地總計驗派共計
四十五都二扇二十四都二扇二十二都四扇實熟田共一
千六百九十七頃四十九畝五分九釐七毫無分官戶民戶
一體均派驗見每田四十畝該出一夫共該夫四千二百四
十四夫每夫該開土方一方七分五釐五毫若全責于民力
委不能堪今議半用民力半爲官助互相協濟合用民開工
五萬九千五百八十八工今民自備工本外應官助工五萬
九千五百八十八工每工該給官銀二分共該官助銀一千
一百九十一兩七錢六分北水門外應築中壩一條合用工
三十五工不用椿笆兩旁得利市房業戶情願挑築不必動
支官帑外福山塘港口應築大壩一條合用工料銀九兩九
錢六分又福山城外應脩吊橋一座合用工料銀五兩連前
築壩等項共計該銀一千二百六兩七錢二分此皆本縣身
親逐一丈勘叅酌處置定奪並無虛冒已將本河照水深淺
夫工難易分爲二十二號遴選千百長逐號分管督率夫役
擇于本年正月二十八日下宕開挑又委水利張王簿在工
專督本縣不時親查而民向苦于轉運艱于桔槔今皆舉手

申蒙

本府知府李

批據申料理備極苦心區畫具有良法善爲虞民永利視艸艸塞責者功相萬也准如議一一照行工完另報仍候

院道詳示行繳

帶管蘇松兵備右叅政蔡

批仰候

兩院詳行繳

巡按御史馬

批福山河開濬事宜區畫精詳俱如議派夫及設處

官銀協助委官督工興濬完報繳吳浦三丈浦二河候本河工竣另議詳行

巡撫都御史周

批如議動支給發及時濬築務求永利工完報繳

覆勘福山塘府帖

蘇州府爲通水利順輿情萬命攸關百里樂業事本年五月十九日奉

兵備右叅政楊 憲牌該奉

巡撫都御史周 批據蘇州府韓同知呈奉

本院批據常熟縣申詳獎賞開濬福山河工員役緣由奉批福山河成足爲民永利該縣循良實政此足窺其一班矣仰

水利廳親詣查勘有功員役分別議賞繳奉該本職帶管水利于本年四月初三日奉委在于常熟縣催償運糧完足開幫隨督同該縣知縣耿 水利主簿張以正幫督主簿王化巡檢孫應登公正蕭體信千百長王用等前詣福山塘河處所逐一丈勘盡皆如式深通並無潦艸虛冒等獎查得往歲脩濬率皆虛應以故濬不旋踵而淤壅隨之致有今日之大廢職此故也河凡數十里工費僅千餘經畫苦心利賴數世邑令軫民瘼之隱庶民勤子來之誠該縣循良可稱卓異再照水利主簿張以正矢心協理殫力効勞大工速成民忘其瘁可謂勵精厥職以成令志者也相應獎賞以彰優異主簿王化巡檢孫應登分地程工服勤公務勸相不怠相繼告成可謂恪事任勞以稱委用者也亦當加賞勵勤公正蕭體信奉公督役千長王用首先倡義均當給扁以風百姓其餘若吳光復等相率在公終上之事均給花紅以爲服役者勸如此則功不虛勞賞非濫及而凡有興作吏民踴躍趨事矣等因奉批仰蘇松道查報奉此擬合就行爲此牌仰本府官吏照牌事理卽將水利廳報驗常熟縣開完福山河再一覆查果否深通是否永利督濬員役作何分別獎賞應賞銀兩何處措辦查議明白限十日內具由詳報以憑覆核轉詳等因奉此擬合就行爲此帖仰本縣官吏查照帖文備奉憲牌事理卽查該廳申報該縣開完福山一河覆查果否深通是否永利督濬員役是否實心任事應否獎賞合用應賞銀兩于

何出辦文到作速查議明白星夜回報以憑覆核轉詳施行
毋得遲違未復須至帖者

行獎福山塘管工員役府帖

蘇州府爲通水利順輿情萬命攸關百里樂業事奉

兵備右叅政楊 憲牌該奉

巡撫都御史周 批該本道呈詳常熟縣開濬福山河工完
獎賞効勞有功官役緣由奉批如議照數動支行賞繳奉此
案照行據蘇州府申前事該本道看得常熟縣福山河工告
成可垂永利効勞員役先據該縣議照

按院批詳動備用銀給水利主簿張以正四兩隨議給管糧
主簿王化巡檢孫應登各一兩十長王用公正蕭體信各給
花紅扁額吳光復等均給花紅分別賞賚似已妥當又經該
府覆查別無異議似應准從候詳允示行府轉行該縣于備
用銀內如數動支行賞以風勸事完日開銷等因呈批前因
擬合就行爲此牌仰本府官吏照依備奉批詳內事理卽便
轉行該縣照數動支備用銀四兩并備花紅扁額將各員役
分別獎賞完日由報等因奉此擬合就行爲此仰縣官吏遵
照憲牌內事理卽將應獎水利主簿張以正銀四兩管糧主
簿王化巡檢孫應登各一兩十長王用公正蕭體信各給花
紅扁額吳光復等均給花紅分別獎賞完日由報轉達施行
須至帖者

公正乞三丈奚浦兩河並濬呈

上中下十四等都公正黃閣錢抑錢就胤黃鉞錢文成錢洽
錢道等呈爲懇天並舉大工以利民生以禪國計事切照奚
浦三丈浦皆海道之咽喉也邇年以來苦被潮沙淤塞遇旱
則無以灌溉遇澇則無以宣洩以致田畝日漸荒蕪黎庶惶
惶將散今幸仁臺下車以來視民如傷遍歷踏勘目擊時危
得議開濬爲首務實萬姓有更生之望今臺體恤民艱先濬
三丈浦次濬奚浦然兩河總屬一脉若開深三丈浦則奚浦
底高水悉歸于三丈閣等區之田畝必束手無救矣再懇天
臺必求兩河並濬庶國課有裨民生有賴是爲一勞永逸有
此連名具呈

公正乞動協區呈

十四等都公正錢紹就錢抑陳楸錢端錢道等呈爲懇動大
衆興大工以偃開濬以垂永賴事切惟三丈奚浦二塘俱爲
一邑之幹河邇來淤塞日久遂使高區苦無灌溉低區苦無
洩瀉其爲民患非一日矣今蒙天臺爲國爲民同時開濬紹
等非不知一勞永逸亦非不樂趨事赴工但紹等與二十二
都之民力有限而兩河之工程浩繁匪惟勢所不逮抑恐曠
日持久將來春潮衝激壩有他虞東作羈延西成少望不可
不爲之慮也查得一都二都三都五都田地接壤俱爲上流
而三丈奚浦皆水道咽喉若使下流壅塞則潮汐不通亢旱
何以厚救淋漓連綿水澇何以宣洩是各區所賴兩河尤非
眇小懇天亟弔一二等都文冊論田派宕庶使勞逸適均輿

情悅服大工易就有此具呈

本縣 批三丈奚浦原不宜動一二三五等都第兩河並
濬原出土民樂趨之役而鄰都協辦亦有緩急共
濟之情查太倉嘉定每河俱派通縣况此四都于
此兩河亦沾有遠利准與協開但派夫從寬可也
此一時權宜後不為例

張文獻呈

北京西寧侯宋下舍人張文獻具呈為籲天遵法完辦公務
事侯主有庄田一千九百五十畝坐落臺治二都地方今蒙
天臺足國為民開濬三丈浦官河有該區公正張學報主列
名官戶隨蒙刻限興工事難稽緩切思其田原坐本地地方大
戶范文席貫席龍曹禹等遞年分種今主京都隔遠獻又孤
身道途附屬土俗實切不諳案限興工恐違仁政其主宋綱
名下折兵官銀漕糧等項已經賠貯完訖今願將本年分未
收各大戶名下糧租逐一粘單開具伏乞准着公正張學聽
除給付各戶作為工食驗法派夫庶臨期不致稽延開濬河
工得以兩便易完有此上呈

本縣 批開河事地方永利也若將舊欠租戶塘塞事必
難成况本縣大小鄉宦俱尚義願開張文獻何得
囂囂呈擾仰着公正張學秉公查議毋阻大事

公正乞濬竺塘呈

二十二都公正陶滄王家相龔察等具呈為乘時開濬利國

利民事本區竺塘河東通福山港西接三丈浦兩旁糧田三千餘畝悉資灌溉又枝河鰻魚涇坊家浜湖水潮源南北相貫實竺塘河通接要處天臺開濬三丈浦福山塘深濶如式而竺塘居中其底不啻如岸見今勻水不留旱澇何賴伏望天臺普一視之仁軫民食之源伏乞委官亟令沾利業戶刻日興工下宕庶願自開濬者踴躍赴工而怠惰坐視者亦勉強趨事利覃一方恩垂罔極有此隨將業戶姓名分派丈尺具冊呈報須至呈者

里排乞濬李墓等河呈

二十八都正副扇里排徐康等具呈為懇恩疏濬要河永利民生事竊惟本區李墓貴涇兩河東通白茆西抵許浦南接鹽鐵北連大海不惟二十八九等高區利其灌溉卽二十五六七等低區亦賴其宣洩今通處僅存一線塞處幾成陸途為商為賈病舟楫之難通力圃力農苦田疇之日瘠幸遇天臺軫念民瘼普興水利如福山三丈浦已沾雨露之恩而本區億萬民深切雲霓之望伏懇准着該役人等論坐區以起夫按田畝以派宕移諭嚴程親臨考績庶豪家不敢抗違良民急于趨赴百年永利萬代鴻恩有此具呈

李墓塘智林寺偶書

無黨無偏王道平平里睦塘衡浦皆治東之要繫枝河也里睦為大工費三倍于衡浦徐歸二大姓實居其地歸市在衡浦徐市在里睦每有開濬之舉二姓分股任之小大難易不

均不平百姓嘖嘖久矣耿令曰論族較氏江左之俗獎令爲地方持平法惟論田起夫開河以濟田也開里睦則里睦之田任之開衡浦則衡浦之田任之通開則通兩河之田任之吾何知有歸徐哉舉大工與大衆未有不平其心平其政而能令衆志踴服者卽有強梗又何避焉查徐氏之田居里睦有七衡浦者三歸氏之田居衡浦者七里睦者三而工力則兩河大不相侔耳以本河之田爲本河法之至平而情之至順吾民其各化其偏鄙耶里睦舊名李墓衡浦舊名橫浦今易之里黨雍睦如衡之平此吾之所以望吾民也

禁大戶科派市民開河示

常熟縣爲生事誑天陰蠹仁政懇關安民事據歸市鎮居民戴武許彥等連名呈前事呈稱云云等情前來據此爲照本縣疏濬水利皆論田起夫立法已久炳若日星止開市鎮之河畧借市廛之民力耳况市井之民取利錙銖何堪奸豪大戶仗役鯨吞也深可痛恨除另行提究外合行出示曉諭爲此示仰該區居民人等知悉本縣除市河之外並不用市民開濬尺寸爾等各安心治業今後如有棍徒仍前搥惑鄉愚生事誑詐者許卽指名首告以憑枷號重治不恕

任陽潭塘公正里排建閘呈

任陽四十都潭塘四十四都公正里排蔣淵戴文漢陳汴朱家相王禹高魁張治薛述韓柏槐侯詔金宇鄒正蒙等具呈爲仰陳水利事宜懇天採擇施行以全萬命以垂百世永逸

事切惟常熟爲姑蘇巨邑地居姑蘇之下流南通震澤北抵大海衆流滙聚汎溢爲災故素稱水澤之國而任陽潭塘尤爲極下之區邇年水患頻仍百姓歿徙過半田地日漸臻蕪國課十逋八九幸蒙天臺焦心勞力念切民瘼大興水利淵等久困疲民慶幸再生有路遵奉明諭開濬涇河脩築岸塍咸願爭先如法完工粘單開報切今河岸雖脩照得任陽潭塘形似仰盂四面涇河皆係納水之門一遇天雨東自太倉岡身及西南長洲崑山陽城傀儡巴城等湖之水而向七浦入海浦東七鴉口淤塞不通則三州縣諸湖港之水停貯于任陽六區間西自江陰無錫之水入蠡湖及本縣尚湖佳菱宛山王巷等蕩長洲野長涇等處悉由華蕩越常熟塘導昆城湖下白茆入海白茆淤漸平陸則三吳之水蓄滯于潭塘各區間諸流湧漫勢若奔雷區區岸塍焉能抵禦懇乞天臺相度地勢照依高區開河事例驗田設處將任陽七浦塘南四區在于陶舍涇丁澤涇東西鄔坵涇東西重罡涇濠涇牛尾涇曲漚西斜塘沈家浜防備漚石灰涇周涇南北觀音圩古全涇東西鷺涇倒插浜瓦洩涇蕩涇黃旻涇橫塘等涇門各建小閘東北禦太倉高岡之下衝西南禦長洲崑山陽城等湖之汎溢北抵七浦之橫流塘北二區在于山涇小周涇大周涇廟涇北橫塘等涇口亦各造一小閘而西湖東海任其往來則任陽永無昏墊之虞矣潭塘六區坐居白茆西南將殷庄涇張四蕩建造石閘以拒華蕩建瓴之水張港涇顧

涇橋填築壩堰以絕常熟塘奔潰之流仍令業戶居民脩葺大潭塘中潭塘東潭塘陳蕩等壩閘毋容坍塌廢弛則潭塘永享平成之利矣自茲以往旱乾水溢不能爲災二十餘萬荒穢低田得以常稔八萬餘石歲供糧儲不致有虧天垂萬世永利民沾不朽洪恩實爲百世甘棠遺愛有此激切連名開呈須至呈者

覆議脩濬水利府帖

蘇州府爲大興水利以足民足國事奉

兵備右叅政楊 案驗奉

巡撫都御史周 批據常熟縣申詳濬築河圩緣由奉批譚

水利至詳至悉仰蘇松道將該縣開具圖冊通行各縣造報如該縣式仍督令各縣着實舉行本院今秋將遍歷觀厥成焉此繳奉此案仰本府官吏卽將發去圖冊二本行屬通將境內河圩照常熟縣規式查議應開應築緣由畫圖貼說備造全冊通詳仍一面督令該縣及各州縣掌印官着實舉行聽 本院秋間親歷驗勘施行等因奉此又奉

本道憲牌亦爲前事蒙

巡按御史楊 批據常熟縣條議濬築河圩繪圖貼說緣由

蒙批有司畱心水利者有矣未有究悉利害至纖至備如該縣之圖說與條議者也本院閱未及竟已見該縣之苦心矣其間工程之緩急錢糧之出辦蘇松道再與酌議的確以優舉行或時下水澇將降不妨議有成規至期可舉事也繳蒙

此擬合就行爲此牌仰本府查照先今事理卽將該縣應濬應築河圩應緩應急工程應用官銀民力等項再一酌議妥確具由詳報以憑轉詳如各河目前有水亦須作急議妥至期舉行仍令照造圖說一部送道查考施行等因奉此擬合并行爲此帖仰本縣官吏照帖備奉案牌內事理卽將該縣所轄境內應濬築河圩工程應用官銀民力等項再一酌議停妥并造圖說一部具由徑詳本道轉詳施行仍申本府知會一面着實舉行候 本院秋間親歷勘驗毋得違悞須至帖者

開三丈浦奚浦等河夫工錢糧申畧

查看得西北陸柒捌玖拾肆等區地土高阜勢若岡陵歲罹乾旱統藉以滋灌溉轉漕儲通商貨者惟三丈浦奚浦爲最急也第二河接連河陽浪澄等塘延袤七十餘里遡自萬曆七年開濬至今爲時已久淤沙壅積漸次成陸不惟桔槔無措抑且糧餉難輸病國病民莫有甚于此者昨歲春間議將二河欲與福山塘並舉但物力有限故先濬福山塘而三丈浦奚浦留于秋成後同濬此皆參酌民情定緩急也卽今東作未興正農隙之際而三丈奚浦並宜與濬及東北高區梅林李墓貴涇橫瀝湖漕鹽鐵橫浦六尺溝等八河皆附白茆之緊要枝河也亦因沙土淤塞則白茆幹河已漸淤塞而各枝河遂成平陸尤當亟濬是以貳拾伍貳拾陸柒捌玖叁拾叁拾壹叁拾叁拾肆拾壹都拾區之田畝遇澇無以宣

洩則花苴易于腐爛旱不能車救則禾苗悉成枯槁以故貳拾捌等區民徐康等具呈懇乞開濬已經親詣查勘無異并經查將去歲福山塘兩旁未開枝河共伍拾壹條分投委官丈量明白俱因工程簡易民力自應照田起夫挑濬本縣已經遴選千百長擇日起工仍行典史羅欽俸管理梅林李墓貴涇橫浦巡檢施甘棠管理橫瀝湖漕鹽鐵六尺溝主簿王化管理福山兩旁枝河見在興工挑濬外其三丈浦奚浦工覺繁鉅者隨經督同水利主簿張以正黃泗浦巡檢孫應登逐一丈見三丈浦河身長伍千叁百壹拾丈伍尺原議面濶伍丈底濶叁丈俱以仰月爲形兩岸虛深不算連面開深肆丈以此爲則每丈算見土方壹方陸分該土方捌千肆百玖拾陸方捌分今除見在面濶底深不等土方壹千玖百叁拾叁方貳分不濬外通長實應濬土方陸千伍百陸拾叁方陸分每方該工拾陸工共該工壹拾萬伍千壹拾柒工陸分應于兩旁壹都叁都兩扇叁都半扇伍都陸都柒都捌都玖都拾壹都上拾肆都共柒扇連前共計玖扇半遠近得利實熟田上計算分別水利遠近不論官戶民戶一體驗派歸見遠區如壹都貳都兩扇叁都半扇伍都壹扇捌都壹扇拾壹都壹扇共實熟田壹千伍百玖頃肆拾捌畝捌分伍釐柒毫每田陸拾畝該出壹夫共該夫貳千伍百壹拾伍夫捌分壹釐近區如陸柒玖都上拾肆都計肆扇共實熟田壹千捌拾伍頃肆拾柒畝陸分叁釐肆毫每田肆拾畝該出壹夫共夫貳

千柒百壹拾叁夫陸分玖釐通共夫伍千貳百貳拾玖夫伍分每夫該開土方壹方貳分伍釐肆毫肆絲以足前項實濬土方之數今議官叁民柒合用民工柒分令民自備外官助叁分該工叁萬壹千伍百伍工貳分捌釐每工該銀貳分共該官助銀陸百叁拾兩壹錢伍釐陸毫自海口至南渡船頭止兩頭應築大壩各壹條叁大壩合用人工土方竹笆艸牛筏簞等銀貳拾陸兩貳項共銀陸百伍拾陸兩壹錢伍釐陸毫奚浦河身長肆千叁百肆拾丈原議面濶叁丈底濶貳丈亦以仰月爲形兩岸虛深不算隨面開深叁尺以此爲則每丈算見土方柒分伍釐通長共算見土方叁千貳百伍拾伍方每方該工拾陸工共該工伍萬貳千捌拾工應千兩有叁都半扇中拾肆都下拾肆都貳扇貳拾貳都兩扇共計肆扇半遠近得利實熟田上計算驗見叁都半扇貳拾貳都兩扇遠區共實熟田陸百伍拾柒頃玖拾畝捌分叁釐壹毫每田陸拾畝出壹夫共該壹千玖拾陸夫伍分壹釐近區中拾肆都下拾肆都兩扇共實熟田陸百頃陸拾叁畝伍分陸釐陸毫每田肆拾畝該出壹夫共夫壹千伍百壹夫伍分玖釐通共夫壹千伍百玖拾捌夫壹分每夫該開土方壹方貳分伍釐肆毫肆絲以足前項實濬土方之數亦以官叁民柒算合用民工柒分令民自備外官叁分該助工壹萬伍千陸百貳拾肆工每工該銀貳分共該官助銀叁百壹拾貳兩肆錢捌分又自海口北壩量給夫工銀貳兩南壩田庄得利市民願

備椿木自築外二項共計該銀叁百壹拾肆兩肆錢捌分以
上二河連前共計該銀玖百柒拾兩伍錢捌分伍釐陸毫案
查先年開濬奚浦一河動支官銀貳千柒百兩零三丈浦則
又過倍矣乃因廊卷先年被火煨燼無存無從查考由今較
昔所費不過十分之二祇緣照田派工不分貴賤貧富無容
紆宄漏脫故遠邇百姓樂于趨事卑職躬親丈勘算確無異
分定號數遴選千百長管理又經牒行水利主簿張以正巡
檢孫應登督率夫役擇于萬曆叁拾肆年正月拾玖日斬壩
派宕興工開濬迄今工及伍分但合用官銀未經處給查得
太倉軍儲歷有省存萬曆貳拾玖年分省米貳千柒百柒石
肆升叁合肆勺又叁拾年省米壹千陸百貳拾柒石叁斗柒
升壹合柒勺共米肆千叁百叁拾肆石肆斗壹升伍合伍勺
奉帖每石折銀伍錢該銀貳千壹百陸拾柒兩貳錢柒釐柒
毫于內可以動支抵給二河工費第查前銀雖派而未徵向
被紆胥猾戶拖逋隱苦欲置而不追額糧豈容乾沒今當興
濬之期合無查將前銀改充二河工用仍免其追呼派作叁
拾肆年徃編各役工食印給堂票對支扣留本年力差役銀
抵作興濬之費餘存再聽別項動支一轉移間而工可聿成
錢糧均足矣

申蒙

本府帶管水利廳王

批二河關係匪小據議經畫甚詳設處妥當無從別

議矣本廳照此轉報仰候

院道詳示行繳

蘇松道楊

批仰府覆議妥確速報仍候

院詳行繳

常鎮道蔡

批據議開濬三丈浦奚浦二河費省而功多且以省
存軍儲對支役銀尤爲官民兩便之方仰該縣着實
照議編派督率興工仍候

兩院詳示行繳

按院楊

批三丈奚浦等河如議動支錢糧委官挑濬繳

撫院周

批如議着實行繳

報三丈浦等河完工申畧

查得三丈浦奚浦并梅林李墓橫瀝等河年久淤塞商民稱
病隨經親行文量應濬面底深濶丈尺合用土方夫工錢糧
除民力自濬者不開外惟是三丈浦奚浦工費浩繁原議官
民協濬官出其參該銀玖百柒拾兩伍錢捌分伍釐陸毫民
出其柒自行辦理具由通詳去後今奉批牒行水利主簿張
以正督濬間爲照各河延袤百里交錯如岐東西隔絕難于
兼理分委主簿王化管濬福山塘枝河典史羅欽俸管濬梅

林李墓貴涇橫浦巡檢孫應登管濬奚浦施甘棠管濬橫瀝
鹽鐵湖漕六尺溝各河隨于本年正月十九等日興工開濬
去後續准水利主簿張以正等官呈報三文浦于二月十六
日完工奚浦梅林李墓貴涇橫浦鹽鐵橫瀝湖漕六尺溝等
各河俱于二月二十五日完工准經親詣各該河所驗果深
通如式備由請乞委官覆驗間隨蒙

本府行委總巡通判周 臨縣查閱各河面底深濶俱合原
詳規式外今該本縣知縣耿 重覆叅看得各河並舉而三
丈奚浦工程更繁董工張主簿拮据大工寢食俱廢櫛風暴
日茹糜餐水甫二十日而工完工王主簿管濬枝河肆拾玖條
經濬河宕貳萬壹千肆百捌拾丈工成不日百姓謳歌羅典
史孫巡檢施巡檢焦勞分理胼胝督催不越月而俱已竣事
見今鑄石頌德者處處皆然禁之不止皆由各官勤督賢能
故勞民而民不怨也相應請乞特加獎勵其餘千百長等役
倍極勞苦亦宜分別優賞以勸將來

申蒙

總巡廳周

批據申各官林有勞績良可嘉尚無亦稱長吏者鐘
鼓式霽宜其響應之速耶仰候

院道府詳示行繳

帶管水利廳王

批候

院道詳行繳

本府李

批水道大通利民匪細有勞各官自宜獎異仰候院道詳示行繳

蘇松道楊

批前詳因有太倉存剩軍儲批府使與議今府尚未報而河工已竣該縣真才敏矣仰候

院詳行繳

常鎮道蔡

批三文奚浦工鉅成速梅林等河力齊事舉皆該縣率作之勤而分猷念効胼胝張以正王化羅欽俸孫應登施甘棠俱與有勞焉諸員役分別獎賞以示勸勵宜也仰候兩院詳示行繳

按院楊

批効勞河工員役仰遵另牌獎賞繳

撫院周

批張主簿獎銀陸兩王主簿獎銀伍兩羅典史獎銀參兩餘各賞銀貳兩以示激勸繳

本府總巡通判周 覆勘三文浦等河工牒畧

本廳弔取河工冊籍于本年三月二十日親詣三文等浦公同該縣耿知縣及原委管工員役逐一查勘明白爲照鑿渠

溉田爲民興利譚吏治者率豔稱之然逞逞有財殫力詘而
績用弗成者何以故亾其如漢史所載平繇相形與夫明計
商利諸方畧槩未之講耶若者工力雖勤猶之拾瀋民且告
勞績于何著茲行視該縣所濬鑿三丈浦奚浦等河深淺濶
狹較之原所定擬宛如券合猶或有其過之亾不及焉及觀
民所自濬梅林塘等一帶河渠又率象指而行靡然從令于
原式無少違者諸水區分流貫周浹成效綽綽可覩已本職
徘徊四顧不覺灑然變色易容焉蓋縉紳父老來言曰使君
之爲是役良苦矣諸所條上方畧皆焦神極能其于漢法可
謂兼之而水輪水線之巧則史中所不載尤爲超軼遠甚况
與夫方畧疎濶徒董董繕完故堤增卑倍薄者可相提而論
哉興百世之利爲百姓福吾儕寔受使君之賜本職頷其言
亟索諸方畧覆視之良信乃知民不煩勞而績用告成彼誠
有所試其長非苟而已也抑本職又聞之商斗周尺蓋準之
虞律而定其大小長短者也他日入于秦市雖增其寸起損
其分冉鑿其槩澤削其底由是抱布負米者盈咸陽之街稱
病矣然則布多方垂來禱本府所爲沛然亟下德音者是意
乎環海生霧億萬世無疆之福其始基之矣本職謬充行河
使者比于皇華采風以獻之義故敢纒纒爲復夏手額爲慶
焉乃若水之所宜放工食之所宜給與有功負役如張以正
等之所宜敘則主持之柄寔惟 上命使者何敢緩頰也煩
爲查奪轉達云云

本府覆議軍儲帖畧

照得常熟縣興濬三丈浦奚浦等河以灌溉田畝通行舟楫實裨于國計民生最急務也該縣原議查將貳拾玖叁拾年省存太倉軍儲米折銀貳千壹百陸拾柒兩貳錢柒釐柒毫係屬民欠者今據改派叁拾肆年力差工食對支仍將本年從銀易新扣抵開河工費意謂此項有派無徵以會計論之亦屬錢糧而久爲姦民拖逋卽今疏鑿二河爲民興利所費不貲動支錢穀勢所不免是以籌畫處分將舊逋以抵力差易新銀以資工費官不煩而民不擾似爲兩便今據原估二河工料銀玖百柒拾兩伍錢捌分伍釐陸毫該縣先奉

兩院允示已將前詳易新銀動支肆百柒拾壹兩貳錢玖分給散殆半今旣工已告成本府又經行委該廳覆驗如式找給工料似無別議但據原詳兩年省存軍儲銀貳千壹百陸拾柒兩貳錢柒釐柒毫內除河工支用外尚餘銀壹千壹百玖拾陸兩陸錢貳分貳釐壹毫或聽從前詳將來脩濬白茆許浦等河如任陽潭塘等岸闡支用或仍歸本項支解聽議確另詳其管理河工力功負役亦聽該縣見詳

院道允示分別優獎施行等因備由申詳去後今奉批前因合就仰縣官吏卽將原詳三丈浦奚浦用過工料銀玖百柒拾兩伍錢捌分伍釐陸毫姑准原詳太倉省存貳拾玖年軍儲銀內支銷以爲一時權宜之事餘尚存兩年軍儲銀壹千壹百玖拾陸兩陸錢貳分貳釐壹毫及有鎮海軍儲省存銀

兩俱聽正項本卷支解不許再詳那動有功負役聽候 兩院詳行仍申府知會毋得違錯須至帖者

附回府催解軍儲申畧

查得貳拾玖叁拾年分存剩軍儲米數雖載在糧冊設而不徵久矣客歲本縣條議河工設處錢糧議將前米序入欸內原議俟後開濬一河則計其合用之費取給于此米之內而此米又係民欠尚欲此見年力差之銀扣作河工查將兩年欠戶派作工食與各役充支此權宜轉移之一意必奉詳允而後敢為者原未嘗有米在倉即可動以易銀亦未嘗扣銀在庫即可用以那解也容俟秋成開徵陸續申報今奉差官守催合先申達云云

按院行獎負役憲牌

巡按直隸監察御史楊 爲大興水利以足民足國事據常

熟縣詳報該縣開濬三丈浦奚浦并梅林李墓等河工告成等因到院據此爲照知縣耿 愛民由飢由溺作事可法可

傳畚鍤功勤稻梁利溥王簿張以正禔躬不苟開濬有功主簿王化勤敏任事職業克脩相應加獎爲此仰縣官吏照牌事理卽于本縣備用或無礙官銀動支拾貳兩折充花幣用獎本官再支銀拾兩分作貳封給獎主簿張以正王化其餘有功負役該縣量行給賞用過銀數具由繳查須至牌者

附軍儲覆議

續奉府牌爲督撫地方事差百戶譚某守催貳拾玖叁拾年分派剩太倉衛軍儲米折銀壹千壹百玖拾陸兩解府給發運軍拾壹拾貳月行糧等因案查前銀未徵在官屢奉差官差快坐催不得已先撮見徵銀貳百捌拾貳兩肆錢應解外止未完銀玖百貳拾肆兩零原係各該年細戶拖欠若欲徵之于民似爲過厲取給于借艱于處補非屬允支轉移需用則不可也今各河次第疏濬如白茆許浦之淤塞工費之浩繁仰給甚迫尚欲請動別項以佐其費此項軍儲銀似宜留用俟興工之日另詳

禁福山塘爭立船埠由

常熟縣爲稽查奸弊以肅關政事准本縣巡捕縣丞樓 關
文該蒙

督理許野鈔關戶部員外郎劉 信牌備據福山港駁船戶
言橋等連名呈稱本港舊規艦船俱泊常熟縣北水門外俟
駁船港口運貨交裝等情又據委官蔣立愈呈同前事案經
備行該縣查議務裨上周 國課下不病民去後隨據該縣
覆查議前來暫據出示曉諭外及查所委官役舊規俱于港
口驗船發單少杜奸弊今訪得各員役俱于北水門外置立
木柵擅自更移不知奉何明文乃敢玩法倘其間阻絕艦船
而駁船爲橫私通差役病國病商殊非法紀爲此牌仰本官
卽查北水門外因何置立木柵何故擅自更移艦船應否阻
絕駁船果否橫行毋避嫌怨逐一清查務祈 國課民情兩
無妨礙等因蒙此隨該卑職查審得常熟縣北水門外福山
塘一帶直通江北貨船由以往來原先艦船徑抵福山上貨
而部令巡司發單納鈔迨後塘漸水淺艦船隨帶駁船駁至
北水門盤入船內再後塘益成淤止將駁船載貨至于北門
與艦船交代而部命徵鈔者遂相沿居北水門矣今蒙正堂
耿 念貨船之往來不使田畝之灌注無資申明 撫 按
道府而深濬之不惟可以足民天而貨船從茲無礙行矣夫
此一塘之深也南門艦船埠頭胡虞等因之而喜何者以可
利已之爲船也北門駁船埠頭言橋等因之而悲何者以使
于艦船而已之駁船無所用之也故言橋等今五月初九日

以懇明舊規裕國通商以垂永久事呈縣而又以開報駁船
納鈔呈 部仍欲駁船運貨北門始交盤艦船一水而分爲
兩截夫以深濬之塘而欲阻艦船之行勢之不可得明也然
均屬埠頭何分艦駁况駁船既已納鈔安所廢之獨不可兩
存而俱利之耶計前事而籌其便莫若祖舊制令巡司移鎮
福山以定各船之趨向無分南埠北埠貨之少者用駁船貨
之多者用艦船任客之便從貨之宜或往或來無使阻絕此
乃經久之規也若木柵舊置設以備盜年久漸壞言橋爲防
禦而稍行脩理及遇勘而僅見故椿並非新創阻絕艦船也
但其不告官而擅行之則可罪耳胡虞本爲爭埠而駕詞霸
截激變亦與有罪焉此舉上關 國課下關民命縣治喫緊

要務卑職未敢徑具招報

部擬合關堂詳奪等因在此案

查先蒙

本部信牌爲稽查奸獎以肅關政事案經暫行備

由照驗去後今准捕衙關蒙

本部信牌前因今該知縣耿

覆看得本縣福山塘原爲江南北溯直商貨往來之咽喉
河淤利用駁船河通則艦船雜進言橋等乃駁船戶胡虞等
乃艦船埠頭紛紛爭告各執一方委官因而來北水門立柵
收鈔左袒駁船則非法矣今議無論艦駁俱歸港口聽貨之
來任客之便貨多則用艦船貨少則用駁船毀柵驅委仍歸
福山權料地方頗已相安

云云

常熟縣水利全書附錄卷上終

